


東林
別
傳

3



東林別傳



清陳鼎撰

東林列傳

出版
印刷

江蘇廣陵古籍刻印社

發行
揚州市古籍書店

定價
七十七元正

出版時間
一九八三年三月

統一書號
一一一〇〇(古)一〇

東林列傳卷末下

江陰陳鼎定九輯門人

沈霽載陽

蔡世英偉人

全校

附熹宗原本本紀下

四年春正月丙辰朔長興民吳野樵作亂殺知縣石
有恒主簿徐可行戊午巡撫貴州都御史王三善自
大方還貴陽半道爲苗賊所遮師潰三善死之監軍

岳具仰同知方明棟梁明泰副將秦明屏皆歿賊勢
復張庚申天津三衛地震有聲川師入龍場獲奢崇
明及其妻子僞官蔡金貴等丁卯以馮從吾爲南京
右都御史葉向高請勿停添註以廣起用從之己巳
何宗彥卒癸酉上色籬番人貢馬及方物乙亥左副
都御史喬應甲奏東林黨魁李三才借黃正賓汪文
言交通趙南星高攀龍等力爲援引上是之丁丑獲
妖人聞香教主王好賢誅之蘇州府何知楊姜忤織
造太監李實蘇松巡撫周起元發實侵漁違禁諸罪

不報葉向高請召還文震孟等不聽裁施歸兵備僉
事癸未日旁有黑子相盪凡四日二月辛卯張輔之
致仕壬辰張經世致仕癸巳葬冲懷太子丙申御經
筵月犯軒轅右星丁酉以左僉都御史沈儆炘爲南
京工部尙書薊州永平山海地震壞城郭廬舍無算
免川廣閩浙香貢命朱燮元處置蘭西故地丁未以
風霾諭邊臣戒備己酉以緝捕功進錦衣衛田爾耕
少保兼太子太保壬子日黃無光甲寅京師地震宮
殿動搖有聲樂亭地裂湧水尺餘三月乙卯朔王象

乾丁母憂以吳用先爲薊遼總督丙辰京師地震戊
午京師地再震庚申夜復震者三癸酉視朝丙子進
田爾耕少傅兼太子太傅御史劉廷宣請祀宋儒張
載父迪於啟聖祠己卯諭京城緝盜癸未東江都司
張盤遇敵於南關嶺死之是月杭州兵變廕內寺魏
忠賢弟爲錦衣百戶夏四月甲申朔親享太廟丙戌
榆林衛民家生豕一首二身二尾八足石砭宣撫司
女將秦良玉其弟秦明屏死於王三善之難有旨勞
之命蔡復一總督雲南湖廣軍務賜尙方劍乙丑禮

部侍郎董其昌奏輯萬曆留中諸疏並薦李維楨宿
學史才從之獲妖民金科馬永等於江淮間誅之乙
巳陽曲榆次地震給事中傅繼誣奏魏大中左光斗
與內閣中書汪文言交通罪狀詔下文言鎮撫司獄
戊申諭行當十大錢嚴私鑄工部尚書王舜鼎卒太
監魏忠賢緝私鑄廢賞命嚴訊汪文言大學士葉向
高乞歸不許敘淮徐禦妖功李養正進太子少保予
廢五月甲寅朔福寧州軍變命許顯純掌北鎮撫司
乙卯賜毛文龍蟒衣仍給敕百道以待有功壬戌禱

雨增鹽課癸亥乾清宮東墀旋風驟起吹內官監大
鉄片盤旋若紙墜於西墀聲若轟雷甲子沈灌死敘
黔中解圍復城功丁卯孫承宗求去舉趙彥自代不
許毛文龍請餉以四十萬給之己卯夜有流星如盞
大青白色自壁入於天倉二小星隨之固原華亭大
雨雹塞上大旱六月癸未朔存問周府應城王在銓
並旌其子肅落孝行左副都御史楊漣劾魏忠賢二
十大罪不問初魏廣微未相先事魏忠賢爲父密
導以邪徑及漣疏入忠賢懼謀於廣微令先逐葉向

高甲申忠賢辭東廠溫旨不允丁酉給事中傅櫬陳
良訓御史張訥各疏攻趙南星左光斗魏大中鄒維
璉等丙申通州新兵譁保定地震巳丑魏大中等劾
魏忠賢客氏傳繼教傳應星之罪忤旨下詔獄向高
救之得免癸巳午刻南方五色雲見太僕少卿朱欽
相給事中許譽卿劉懋御史李應昇特疏糾魏忠賢
掌詹事禮部尙書翁正春給事中熊奮渭朱大典陳
奇瑜吳弘業霍守典孫紹統楊維新等御史劉璞劉
芳房可壯洪如鐘李喬崙郎中鄒維璉等各疏糾魏

忠賢皆不聽丙申大雨雹皇子慈煇薨謚悼懷太子
有中官騎馬入禁門毆傷衛士巡視科臣杜三策劾
奏不問大學士葉向高揭請退忠賢并罷內揅不聽
魏忠賢矯詔杖殺工部屯田司郎中萬燦戊戌撫寧
侯朱國弼劾魏忠賢奪俸閒任命錦衣衛逮其書奏
舍人於獄壬辰逮巡城御史林汝翥汝翥畏杖亡去
投遵化獄巡撫鄧漢以聞仍逮杖之霍州高時正家
生豕二身二眼象鼻四耳四乳尙書趙彥等合疏請
退忠賢詔勿過計甲辰命王守謙往關門諭留孫承

宗丁未朱熹元俘僞都督李遠達等二十五人至京
卹錄大方陣亡將士江南大水辛亥封光宗選侍傳
氏爲懿妃李氏爲康妃秋七月癸丑朔蘭酋奢史都
等伏誅紅彝通倭逼福建禦之辛丑大學士葉向高
致仕以朱光祚爲工部尙書總理河道南師仲爲南
京禮部尙書癸亥六科廊火南給事中楊棟朝劾魏
忠賢搜括南都之害御史李應昇爲慘死萬燬訟冤
黃尊素王振奇杜三策周洪謨萬言揚疏繼上俱報
聞御史劉廷佐請誅忠賢不報詔進大學衍義補給

事中劉懋請罷內操不報河決徐州山東饑賑之島
師三捷八月甲午左都御史孫瑋卒貴州兵克岩頭
寨以捷聞詔肅朝儀褒封五經博士孟所譽母張氏
曰貞懿上耕籍田廣順天解額申明會典輿服之禁
南兵部尙書陳道亨侍郎岳元聲等合疏請去魏忠
賢祭酒蔡毅中率合監師生千餘人請究忠賢二十
四大罪以遵祖訓皆不聽癸卯以高攀龍爲左都御
史辛亥以李維楨爲南京禮部尙書九月壬子朔命
直省搜求誌傳奏疏文集等書送史館以備纂輯從

御史劉芳請也發內運庫新造軍器於關門毛文龍
屢奏捷音御史袁化中駁之曰外之捷在我未嘗斬
將奪城在彼弗聞喪師失地小小捕獲何足獻俘俟
文龍俘叛人至然後宣捷告廟未晚也不聽庚申高
攀龍劾兩淮巡鹽崔呈秀貪污奪秩聽勘庚辰以馮
從吾爲工部尙書冬十月壬午朔親享太廟大學士
魏廣微後至魏大中劾以不敬廣微求去溫旨慰留
廣微遂於魏忠賢所日媒孽之卒成乙丑丙寅之獄
乙酉以曹于汴爲南京右都御史己丑敕諭羣臣辛

卯玉璽見漳水濱巡撫河南程紹以獻文曰受命於
天旣壽永昌丁酉吏部尙書趙南星致仕巳亥右都
御史高攀龍致仕福建官兵破走紅彝搗其巢獻俘
封皇親王天瑞郭振明皆爲伯十一月辛亥朔斥署
吏部事左侍郎陳于廷左副都御史楊漣左僉都御
史左光斗並爲民起崔景榮爲吏部尙書李宗延以
吏部尙書掌都察院事前大學士朱國祚卒督師大
學士孫承宗請入賀萬壽而陳方略不許命速回鎮
巳巳大學士韓爌致仕十二月辛巳朔復逮汪文言

下詔獄召還賈繼春徐景濂王志道從御史梁夢環
請也兩當民變殺知縣牛得用加朱燮元爲兵部尙
書以周希聖爲南京戶部尙書丙申削吏部尙書趙
南星籍大學士朱國禎罷李維楨引疾致仕喬允升
罷以黃克纘爲刑部尙書癸卯南京地震如雷

五年春正月庚戌朔五更木星逆行犯太微垣左執
法辛亥召崔呈秀復其官戊午雲南巡撫閔洪學奏
普安二新之捷辛酉諭江南重災地方漕糧改折三
分之一浙江帶運糧米暫折一年甲子者察天下方

面有司巡按貴州御史傅宗龍請暫停武舉專勵戰
勇拔真才以收實用從之戊辰舉卓異閔夢得等二
十四人命李蕃管理章奏癸酉卹貴州死難諸臣徐
朝炯孫克恕王昌胤楊以成鄭鼎等贈官予廕有差
吏部請燒燬追到楊漣左光斗等誥命一十七軸乙
亥大班糾核朝覲官員起李養春爲刑部尙書以董
其昌爲南京禮部尙書禮部左侍郎協理詹事府事
何如寵冠帶閒任太僕寺卿劉宗周革職追奪誥命
丁丑賜敕獎毛文龍戊寅以慶陵成加孫承宗少師